

Lesley Griffiths AC
Gweinidog yr Amgylchedd, Ynni a Materion Gwledig

12 Mawrth 2019

Annwyl Lesley

Rheoli Ardaloedd Morol Gwarchoddedig yng Nghymru

Fel y gwyddoch, ym mis Awst 2017, cyhoeddodd y Pwyllgor ei adroddiad, *Y Llanw'n troi? Adroddiad ar yr ymchwiliad i ddull Llywodraeth Cymru o reoli Ardaloedd Morol Gwarchoddedig.*

Ers cyhoeddi ein hadroddiad, cafwyd nifer o ddatblygiadau yn y maes polisi hwn, gan gynnwys cyhoeddiadau Llywodraeth Cymru, Fframwaith Rheoli Rhwydwaith Ardaloedd Morol Gwarchoddedig Cymru 2018-2023 a Chynllun Gweithredu Cymru 2018-19. Yn fwy diweddar, rydych chi wedi adrodd i'r Cynulliad ar Ardaloedd Morol Gwarchoddedig yn unol â gofynion Deddf y Môr a Mynediad i'r Arfordir 2009.

Mae'r Pwyllgor wedi cytuno y byddai nawr yn amser priodol i gynnal gwaith dilynol ar reoli Ardaloedd Morol Gwarchoddedig. Er mwyn llywio'r gwaith hwn, hoffem gael y wybodaeth ddiweddaraf gennych am y cynnydd sydd wedi ei wneud o ran gweithredu'r argymhellion yn ein hadroddiad yn 2017. Fel rhan o'ch ymateb, hoffem i chi fynd i'r afael â'r cwestiynau penodol sydd i'w gweld yn **Atodiad 1** i'r llythyr hwn.

Hoffem hefyd gael diweddariad gennych ar y cynnydd o ran cyflawni pob un o'r 21 cam gweithredu yng Nghynllun Gweithredu Rheoli Rhwydwaith



Ardaloedd Morol Gwarchoddedig 2018-19. Os na chadwyd at yr amserlenni ar gyfer cyflawni'r camau gweithredu, dylech gynnwys esboniad ynghyd ag unrhyw ddiwygiadau dilynol i'r amserlenni hyn.

Yn olaf, byddai'n ddefnyddiol pe gallech gadarnhau a fydd Llywodraeth Cymru mewn sefyllfa i fabwysiadu'n ffurfiol Gynllun Morol Cenedlaethol Cymru ('y Cynllun') yn ddiweddarach yn y gwanwyn, gyda golwg ar gwblhau a gweithredu'r Cynllun yn gynnar yn yr haf, yn unol â'r llinell amser y gwnaethoch ei chyhoeddi.

Byddwn yn ddiolchgar pe gallech ymateb erbyn **12 Ebrill** fan bellaf.

Yn gywir,



Mike Hedges AC

Cadeirydd y Pwyllgor Newid Hinsawdd, Amgylchedd a Materion Gwledig



1. A allwch chi roi'r wybodaeth ddiweddaraf am yr hyn sydd wedi deillio o waith Llywodraeth Cymru i ddatblygu dull cyson sy'n seiliedig ar dystiolaeth o fonitro a goruchwyllo safleoedd (yr oedd disgwyl iddo ddod i ben yn haf 2018)? Sut y mae deilliannau'r gwaith hwn wedi llywio dull Llywodraeth Cymru o fonitro safleoedd?
2. Ers cyhoeddi adroddiad y Pwyllgor ym mis Awst 2017, pa gynnydd sydd wedi ei wneud i ganfod unrhyw fylchau o ran creu rhwydwaith ecolegol cydlynol o Ardaloedd Morol Gwarchoddedig yn nyfroedd Cymru, a mynd i'r afael â'r bylchau hynny? A oes unrhyw Ardaloedd Morol Gwarchoddedig newydd wedi cael eu pennu neu eu dynodi i fynd i'r afael â'r bylchau a nodwyd yn yr asesiad yn 2014 a gynhaliwyd gan y Cydbwyllgor Cadwraeth Natur a Cyfoeth Naturiol Cymru? Pa amserlenni ydych chi gweithio tuag atynt i gwblhau'r gwaith hwn?
3. Mae Cyfoeth Naturiol Cymru wedi datblygu nifer o adroddiadau cyflwr dangosol nodweddion ar safleoedd, gyda chyfran fawr o nodweddion safleoedd yn ymddangos i fod mewn cyflwr anffafriol neu anhysbys. Pa gamau y mae Llywodraeth Cymru yn eu cymryd o ganlyniad i'r asesiad hwn? Pa gynnydd sydd wedi ei wneud i ddatblygu proses barhaol a chynaliadwy ar gyfer adrodd ar gyflwr nodweddion safleoedd y gellir ei hailadrodd yn rheolaidd?
4. A allwch chi roi manylion unrhyw waith y mae Llywodraeth Cymru wrthi'n ei wneud i asesu'r angen i ddynodi Ardaloedd Morol Gwarchoddedig ar gyfer rhywogaethau symudol iawn?
5. Pa waith yr ydych chi wedi'i wneud, ers cyhoeddi adroddiad y Pwyllgor, i asesu effaith Brexit ar Ardaloedd Morol Gwarchoddedig Cymru? Gofynnir ichi gynnwys manylion unrhyw waith paratoi i liniaru unrhyw risgiau yr ydych chi wedi'u canfod.
6. Pa gamau penodol yr ydych chi wedi'u cymryd i sicrhau bod trefniadau priodol ar waith i gynnal mesurau gwarchod amgylcheddol morol ar ôl Brexit?



7. Pa gynnydd sydd wedi'i wneud rhwng Llywodraeth y DU a'r Gweinyddiaethau Datganoledig o ran cytuno ar fecanwaith i barhau i reoli ardaloedd morol trawsffiniol, ar ôl Brexit?
8. Pa drefniadau fydd ar waith ar ôl Brexit i asesu ac yna adrodd ar gyflwr a statws safleoedd Ardaloedd Morol Gwarchodedig Cymru, y tu hwnt i'r gofyniad adrodd chwe blynedd yn Neddf y Môr a Mynediad i'r Arfordir 2009?
9. Pa drafodaethau ydych chi wedi'u cael â Llywodraeth y DU ynghylch trefniadau ariannu ar gyfer gweithgareddau rheoli morol ar ôl Brexit? Beth oedd canlyniad y trafodaethau hynny?
10. A allwch chi ddarparu manylion ynghylch unrhyw waith ar Ardaloedd Morol Gwarchodedig sy'n cael ei ariannu ar hyn o bryd gan gronfeydd yr UE, megis Cronfa'r Môr a Physgodfeydd Ewrop a LIFE-Nature, a fyddai'n wynebu risg pe na bai cyllid tebyg ar gael ar ôl Brexit?
11. A allwch chi gadarnhau a oes arian ychwanegol ar gael ar gyfer gwaith ar Ardaloedd Morol Gwarchodedig yn dilyn ymestyn swyddogaethau gweithredol Gweinidogion Cymru ar gyfer cadwraeth forol i ranbarth môr mawr Cymru ym mis Ebrill 2018? Os felly, faint o arian? Os na, beth yw'r rhesymau dros hyn?

